

27 JUN 1998

Gerakan-Bahas

CADANGAN BERI POTONGAN CUKAI KEPADA SYARIKAT SEDIAKAN PINJAMAN

KUALA LUMPUR, 27 Jun (Bernama) -- Kementerian Kewangan dicadang memberi pemotongan cukai syarikat kepada mana-mana syarikat yang menyediakan skim pinjaman untuk pendidikan tinggi.

Cadangan itu dikemukakan semasa perbahasan usul terima kasih ucapan presiden pada perhimpunan agung parti Gerakan di sini hari ini.

Wakil Kelantan Lau Chin Chua, yang membuat cadangan itu juga berkata golongan kaya tidak harus berebut-rebut untuk mendapatkan biasiswa dan pinjaman pendidikan yang disediakan kerajaan.

"Biarlah golongan miskin yang benar-benar memerlukan duit untuk melanjutkan pelajaran di institusi pengajian tinggi mendapatkan kemudahan ini," katanya.

Kira-kira 1,800 perwakilan menghadiri persidangan dua hari itu yang dirasmikan Perdana Menteri Datuk Seri Dr Mahathir Mohamad, yang juga pengerusi Barisan Nasional (BN).

Ketika membentangkan usul itu, wakil Pulau Pinang Teng Cheng Yeow meminta kerajaan memberi perhatian kepada mereka yang terjejas akibat pemansuhan Akta Kawalan Sewa terutama di Pulau Pinang.

Katanya seramai 60,000 penduduk daripada 16,000 keluarga yang mendiami 12,000 premis terbabit dengan pemansuhan akta itu.

Wakil Selangor Steven Chong pula berkata bank-bank harus mengambilkira faktor seperti kemahiran pengurusan, kontrak yang diperolehi, industri yang sedia ada dan jaminan sendiri kepada industri kecil dan sederhana yang memohon pinjaman pada musim kesukaran ekonomi ini.

Wakil Sabah John Chin berkata dana pemulihan pelaburan hendaklah ditubuhkan dengan sebahagian daripada sumber kewangannya diperolehi daripada kerajaan untuk membantu syarikat-syarikat yang tenat.

Beliau juga mahu kerajaan pusat terus membenarkan pekerja asing dibawa masuk ke Sabah kerana negeri itu sejak 30 tahun yang lalu sangat bergantung dengan buruh asing di sektor pertanian dan pembinaan.

Perbahasan usul itu disambung pada hari terakhir perhimpunan esok.

-- BERNAMA

MT RON